

Long wanem as God i no laik stretim ol pasin nogut i save spoilim sindaun bilong yumi?

Long wanem as God i no laik stretim ol pasin nogut i save spoilim sindaun bilong yumi?

Ating planti taim yumi save tingim olsem, “Long wanem as God i no laik mekim save long ol raskol i save bagarapim ol manmeri long rot na long taun?” “Long wanem as God i no laik mekim save long ol manmeri i mekim pasin nogut long ples na i spoilim sindaun bilong yumi?” “Long wanem as God i no laik mekim save na rausim ol manmeri i mekim pasin nogut na i bagarapim ples na i bagarapim sindaun bilong yumi long P.N.G.?”

Ating yumi save tingim olsem, “Sapos God i stap, orait long wanem as Em i no laik kam na stretim ol dispela pasin nogut na mekim save long ol manmeri i save mekim pasin nogut long dispela graun, na mipela *gutpela* manmeri i ken i sindaun gutpela tasol.”

Orait. Sapos God i bihainim dispela tingting bilong yumi na nau nait Em i kam na rausim olgeta pasin nogut na rausim olgeta manmeri i save mekim pasin nogut. Sapos God i kam na mekim save long olgeta manmeri i mekim pasin nogut na Em i klinim dispela graun olgeta. Sapos God i mekim olsem.....

....Orait, husat bai stap?Husat inap i stap?

Yu tingim. Sapos God i mekim save long ol man i bin kilim i dai narapela man, orait ating God i mas mekim save long yu tu. Long wanem? Long tingting bilong God pasin bilong kilim man i dai na pasin bilong bel hat na kros i wankain samting. Na yumi olgeta i bin bel hat na kros long narapela manmeri.

“Yupela save pinis long dispela tok ol lain bipo i bin mekim long ol man. Ol i bin tok olsem, ‘Yu no ken i kilim man i dai. Na husat man i kilim wanpela man i dai,

orait dispela man i mas sanap long kot.’ Orait, tasol Mi tokim yupela olsem, husat man em i bel hat long brata bilong em, em mas sanap long kot.” **Matyu 5:21-22.**

Na sapos God i mekim save long ol man i bin repim sampela meri, orait ating God i mas mekim save long yu tu. Long wanem? Long tingting bilong God pasin bilong repim meri na pasin bilong repim meri insait long tingting i wankain samting. Na yumi olgeta i bin repim meri long tingting bilong yumi.

“Yupela save pinis long dispela tok ol i bin mekim. Ol i bin tok olsem, ‘Yu no ken i mekim pasin pamuk.’ Orait, tasol Mi tokim yupela olsem, husat man i lukluk long wanpela meri na bel bilong em i kirap, orait dispela man em i mekim pasin pamuk pinis long bel bilong em.” **Matyu 5:27-28.**

God bai mekim fea long olgeta manmeri.

God Em i holi na Em i stretpela olgeta. Olsem na, God bai mekim fea long olgeta manmeri. Em i no inap favoritim sampela manmeri, nogat. Em olsem na, taim God i laik stretim olgeta samting long graun na Em i mekim save long olgeta manmeri i bin mekim pasin nogut, orait, i luk olsem Em i ken i mekim save long yumi olgeta. Long wanem? Yumi olgeta i bin mekim pasin nogut. Olsem na, yumi mas klia olsem, i no ol raskol tasol na i no ol manmeri nogut tasol i save mekim pasin nogut. Nogat. Yumi olgeta i save mekim.

“Olgeta manmeri i wankain tasol. Ol i manmeri bilong mekim sin, na ol i kamap sot long glori bilong God.” **Rom 3:22-23.**

“Sapos wanpela man i save bihainim olgeta lo, na em i bin brukim wanpela lo tasol, orait em i gat asua olsem man i bin brukim olgeta lo.” **Jems 2:10.**

Sapos God i sekim yu, orait yu bai olsem wanem?

Yumi save tingim ol narapela manmeri i manmeri bilong mekim pasin nogut. Tasol, sapos God i sekim yu, orait yu bai olsem wanem? God bai lukim pasin nogut i stap long laip bilong yu o nogat? Ating Em bai lukim.

God i makim taim pinis we Em bai kam na mekim save long ol manmeri i mekim pasin nogut.

Yumi no save long wanem taim God bai kam na mekim save long ol manmeri i mekim pasin nogut. Tasol Em bai kam. I no gat kwesten mak long dispela. Em bai

kam. Long wanem? God i no inap larim ol manmeri i sakim Tok bilong Em. Em i no inap larim ol manmeri i givim baksait long Em na i bihainim laik bilong ol yet. Em i no inap larim ol manmeri i save mekim pasin nogut.

God i no inap larim ol manmeri i bin givim hevi o trabel long ol narapela manmeri. God i no inap larim ol manmeri i bin bagarapim narapela manmeri. God i no inap larim ol manmeri i bin mekim tok nogut o mekim pasin nogut long narapela manmeri. Nogat. God bai mekim save long ol.

God Em i gutpela na stretpela olgeta, na Em i no inap pasim ai long ol pasin nogut, nogat. Em bai kam na mekim save long olgeta manmeri i gat rong.

“Long olgeta samting God i bin wokim em i no gat wanpela samting i hait long ai bilong God. Nogat tru. Olgeta samting i stap ples klia long ai bilong God. Na yumi mas klia olsem, long kot bilong dispela God bai yumi sanap.” HIBRU 4: 13.

Em (God) i bin makim wanpela de we Em bai kotim olgeta manmeri. Em bai mekim olsem long stretpela pasin bilong Em. Na Em i makim wanpela man na Em bai i stap jas long dispela kot. Na taim God i kirapim dispela man long matmat Em i soim olgeta manmeri dispela i tru tumas.” APOSEL 17:30-31.

Long de bilong kot bilong God bai yu amamas o bai yu pret?

Bai yu amamas long dispela De God i bin makim bilong stretim pasin nogut bilong ol manmeri o bai yu pret long dispela De, a?

Bai yu olsem wanem long De God i makim bilong mekim save long manmeri i givim baksait long Em? Bai yu stap olsem wanem long De God i makim bilong mekim save long manmeri i mekim pasin nogut?

Jisas i bin tokaut olsem, long De bilong kot bilong God sampela manmeri bai pret nogut tru olgeta. Ol bai singaut olsem, “Ol maunten, yupela bruk na pundaun long mipela na karamapim mipela.” Long wanem? Ol i pret nau long sanap long kot bilong God na ol i tingim, “Mobeta graun i karamapim mipela.” (Yu ken i lukim **Luk 23:26-31** na **Revelesen 6:12-17**.)

Na bai yu pret olsem ol o nogat?

Ol manmeri i tanim bel na i bilipim na trastim na bihainim Jisas ol i no inap pret long De bilong kot bilong God.

Ol manmeri i tanim bel na i bilipim na trastim feitful wok bilong Jisas long diwai kros na bihainim Em ol bai amamas long De bilong kot bilong God. Long wanem? God i bin kotim na stretim pinis olgeta pasin nogut bilong ol.

Na dispela i no minim olsem ol dispela lain i stap stretpela stretpela manmeri tru, na ol lusim olgeta pasin nogut pinis, na ol i no save mekim wanpela rong long laip bilong ol. Nogat.

Tasol, olgeta sin bilong ol, inap long taim mama i karim ol i go inap long taim ol i dai, **olgeta** sin bilong ol God i bin kotim pinis.

Yu save, God i bin transferim olgeta sin bilong ol i go long Jisas na God i bin kotim Jisas long sin bilong ol. Long dispela as tasol Jisas i kisim bagarap long diwai kros na Em i dai. Em olsem na Jisas i bin kisim kot pinis bilong ol manmeri i tanim bel na i bilipim na trastim feitful wok bilong Jisas long diwai kros na i bihainim Em.

Olsem na, long dispela as ol manmeri i tanim bel na bihainim Jisas ol bai amamas long De bilong kot bilong God. Long wanem? Kot bilong ol i no gat. Jisas i bin pinisim pinis kot bilong ol na ol i no inap lukim bel hat bilong God long sin bilong ol. Olsem na, ol i no inap pret long De bilong kot bilong God.

“Tru tumas, Mi tokim yupela: Man i harim tok bilong Mi, na i bilip long God i bin salim Mi i kam, em i gat laip i stap gut oltaim oltaim. Em bai i no gat kot. Nogat. Em i lusim sait bilong i dai na em i kamap insait long laip pinis.” Jon 5:24.

**Yes, God bai stretim ol pasin nogut i save spoilim sindaun bilong yumi.
Yes, Em bai mekim save long ol manmeri i mekim pasin nogut.
Na yes, Em bai kotim ol manmeri i givim baksait long Em. I gat De
bilong ol dispela samting i stap.**

Na yu? Yu bai stap olsem wanem?